



VANJSKOTRGOVINSKA KOMORA BOSNE I HERCEGOVINE  
СПОЉНОТРГОВИНСКА КОМОРА БОСНЕ И ХЕРЦЕГОВИНЕ  
FOREIGN TRADE CHAMBER OF BOSNIA AND HERZEGOVINA



poslovni magazin

**EICC BiH**

Maj/Svibanj - Juni/Lipanj 2006 Br. 3



## EICC BiH je povodom Dana Evrope organizirao seminar pod nazivom Novi pristup - CE označavanje

**K**ao doprinos širem informiranju BiH poduzetnika i ostale zainteresirane javnosti za zahtjeve za sigurnost evropskih potrošača, Euro info korespondentni centar BiH je povodom 9. maja – Dana Evrope, organizirao seminar pod nazivom Novi pristup - CE označavanje.

Ključni predavači na seminaru su bili gosp. Ahmet Žalić (preduzeće Sanitex iz Velike Kladaše), dr. Saša Prešeren i mr. Radomir Marinković, dokazani eksperti iz oblasti tehničkih standarda i CE označavanja iz Slovenije i Bosne i Hercegovine. Direktor EICC BiH, mr. Senad Hromić, je na seminaru predstavio ulogu EICC BiH u informiranju BH poduzetnika.

Kompanije iz Bosne i Hercegovine neće moći izvoziti proizvode na tržište EU ukoliko ne ispoštuju brojne evropske propise, a također neće moći ni plasirati svoje proizvode na tržište BiH.

### Program pomoći Evropske unije u BiH

Euro info korespondentni centar BiH (EICC BiH) Vanjskotrgovinske komore BiH u saradnji sa Privrednom komorom RS i Privrednom/Gospodarskom komorom FBiH, je 17. maja 2006. u Banjoj Luci, u prostorijama Privredne komore RS, organizovao seminar »Programi Evropske unije u BiH«.

Cilj seminara je bio informiranje učesnika o programima EU, naročito onim koji mogu biti od važnosti za BiH, kao što su Šesti okvirni program EU (OP6), INTERREG III, IPA i CARDS.

Prioritet BiH na njenom putu ka članstvu u Evropskoj uniji je ekonomska reforma i tranzicija u tržišnu ekonomiju s ciljem kreiranja održivog ekonomskog rasta i radnih mjesta kako bi se privreda Bosne i Hercegovine što lakše integrirala u strukture Evropske unije. S ciljem pružanja podrške BiH u ispunjenju ovog veoma zahtjevnog zadatka, EU nudi široki spektar različitih programa putem kojih se može dobiti finansijska podrška za različite projekte.

Na seminaru je mr. Irena Rezec, slovenski ekspert za razvoj malih i srednjih preduzeća, predstavila aktuelne informacije o programima EU, glavne karakteristike OP6, od izrade prijedloga u okviru OP6 projekata, do njihove uspješne implementacije. Dosadašnja iskustva BiH na evropskim projektima izložio je mr. Ammar Miraščija,

predstavnik Informativnog tijela za OP6 u BiH, a iskustva BiH vezana za programe IPA, Interreg III i CARDS dao je gosp. Kenan Tahmišćić iz Direkcije za evropske integracije BiH.

Kako je postojanje Euro info korespondentnog centra BiH i korištenje mogućnosti njegovih usluga od velike važnosti za informiranje poslovne domaće javnosti o postojećim programima EU, mr. Senad Hromić, direktor EICC BiH je na seminaru objasnio koju vrstu podrške Centar može ponuditi preduzećima i drugim korisnicima usluga Euro info korespondentnog centra BiH.

